

Die Hochzeitshose

von Michael Mende

frei nach Peter Rosegger

(Stube eines Bauernhauses. Hans kommt herein, er trägt einen Anzug, allerdings keine Hose. Außerdem trägt er grelle Ringelsocken)

- Hans:** *(für sich)*
Ich wärr noch varrickt! Än zwei Stund isch Käisch un isch hab imma noch koh Hous. – Schee sieht sie aus, mei Braut. Awwa des Auslache kann i' net hawwe. „Än Unnahouse wäd net gheiat!“, lesst sie ma ausrichte! Haha. *(schmunzelnd)* Also isch deed sie än Unnahouse haiare. Bsunnas än denne violette mit de vakährtrumme Houseträger dro!
- Lisbeth:** *(tritt ein)*
Ha, Brüderle, willsch jetzat än Unnahouse haiare?
- Hans:** Lach net, die Lag isch ernschd! Isch hed mi net druff eilosse solle, wu de Natterer gsaat hot, dass a' sie äm Somsdag noch vorbeibringt. Ball zieh i' mei Jeans oh!
- Lisbeth:** 'S wäd schun noch klappe, räig di net uff. Awwa Hons, horsch, die Ringelsocke läscht net oh!
- Hans:** Wonn isch mei Hous äm ohns ghabt heed, wie's vorgesehe war, donn deedsch du jetzat mei Socke gar net sehe!
- Lisbeth:** Awwa de Parra deed sie sehe, wonn di nohocksch.
- Hans:** De Parra, der... *(es klingelt)* Des wäd die Hous sei, Lisbeth, sei sou gut un holl ma sie schnell.
(Lisbeth ab, die Großmutter kommt herein)
- Großmutter:** Um Gott's Wille, än Unnahouse un Ringelsocke will a' haiare der Kerl!
- Hans:** Oma, soll i' dir's jetzat aa nochemol vazehle, dass du die Socke gar net sehe deedsch, wonn i' mei Hous heed, wie's vorgesehe war?
- Großmutter:** Awwa de Parra deed sie sehe wonn die ...
- Hans:** ...nohocksch, isch weeb.
- Großmutter:** Alla gut, wonns weesch, no zieg halt onnare Socke oh.
- Lisbeth:** *(tritt ein und wirft Hans die Hose zu)*
Da, zieg sie oh, dass d' unna d' Haub kummsch!
(Während Hans die Hose anzieht, zur Großmutter)
Glaabsch Oma, der deed mit denne Socke än d' Käisch geh! 'S wäd Zeit, dass der Kerl ä Fraa kriegt.
- Hans:** Du liewa Himmel, die senn jo viel zu long, vorneweg zeh Zentimeter, do guck! Also ooni vun eich zwee muss ma die kerze!
- Großmutter:** Nix do! Isch muss jetzat wenigschdens die Schnitzel noch ohbrote, sunschd kenne ma die Geschd später glei än d' Wädschaft schicke. Lisbeth, sei sou gut un mach du des! *(ab)*
- Lisbeth:** Ha, die hot gut schwetze, un wer soll's Hochzisch-Auto fertisch mache? Unn die Fohne fa die Antenne muss i' aa noch binne. No, Hons, sag's de Mutter, dass die's mecht, isch muss wäiklich widda naus *(ab)*.
- Hans:** Jaja, als fort! Losst mi narre hänge!
(zur Tür hinaus rufend, während er die Hose wieder auszieht)
Mutta, Mutta, geh mol gschwind her, sei so gut!

Mutter: *(herein)*
Ihr Leit, Hans, wie siehst du aus? Willsch mit denne Socke än d' Käisch? Was moonsch, wonn...

Hans: ...I mi nohock un de Parra die Socke sieht...

Mutter: Alla, gut dass es weesch! Was isch donn, warum ziegst du die Hous net oh?

Hans: Sei sou gut, unn mach ma die House ä bissl kerza, die isch 10 Minute zu long.

Mutter: Du moonsch 10 Zentimeter!

Hans: Haja, Dunnaweddl, isch bin schun gonz varrickt vor lauter lauter.

Mutter: Weesch Du, dass dei Braut schun draus mit ihre gonze Verwondschaft steht! Denne muss i' jetzt wenigschdens än Schnaps ohbiete! *(will abgehen)*

Hans: Ah Mutter, saare mol, soll i' mittare Hous wu zu long isch än d' Käisch gehe, dass i' alle Ridd long nohagl?

Mutter: Wäd valleicht 's beschd sei, donn konnsch Di aa nohocke unn de Parra sieht imma noch nix vun deine Socke. *(ab)*

Hans: Haha! Isch des awwa luschiedlich! Um alles kimmare sie sich, awwa de Wischdigschde wäd äm Stich glosst! Sou isch's mit denne Waiwa, wonn ma sie mol brauche kann, senn sie net do! Was bin isch frouh, dass isch Zimmamonn glernt hab, *(zum Publikum)* weil ihr wisst jo, wer oh Hondwerk glernt hott, kann jedes Hondwerk. Ob ich ä Dachlatt, än Sparre odda ä Hous abläng, sou grouß wäd der Unnaschied net sei!
*(Er holt seine Handwerksutensilien, eine Säge, Stemmeisen und einen großen Winkel, steckt sich einen Bleistift hinter die Ohren).
(Indem er die Hose auf den Tisch legt und den Winkel anlegt):
Genau 90 Grad zeh Zentimeter, des derft doch koh Problem sei.
(es klappt nicht) Hergottsack, deedsch mol ruhisch lieje bleiwe, du dabbischi Hous, wie soll i' donn do den Winkel oleje? De Bleistift molt aa net, do wäsch doch varrickt. Reiß ma's halt mi'm Stemmeise oh, sou jetzt hämma's, jetzat nur noch weg mit denne 10 Zentimeter.
(Er klemmt sich die Säge zwischen die Beine und zieht die Hosenbeine nacheinander über das Sägeblatt.)*
Klappt doch, odda? Naja, schee isch was onnares! Warum frontst du denn des sou aus? Die Säg isch doch scharf!
(Die abgetrennten Stellen betrachtend)
Des Ausfronste gfällt ma net sou. Mittare Dachlatt wää des bessa gonge! Was mach i'n do jetzat, dass des net sou dabbisch aussieht?
(Zum Publikum) Ob i' ä Zierleischd nomach? Mol äm Schopfe gucke, ob i' was finn! *(ab)*

Mutter: *(herein)*
Sou jetzat hewwe die ihrn Schnaps, donn senn sie erscht mol zufriede.
(Holt das Nähzeug)
Jetzt zeig ämol her, des Ding!
(Betrachtet die Hose)
Also der Natterer hott aa schun sauwara gschafft! Ha do guck no,

ausgfronst bis zum Dortnaus. Egal, wonn die 10 Zentimeter weg senn, isch's egal, awwa des kriegt a' noch gsaat! Sou usauwa kann ma net schaffe!

(Kürzt die Hose um 10 Zentimeter)

Sou hemmas. Jetzt messt i's noch e bissele umnähe. Wu hawwin mein schwarze Fade? Mol gschwind owwe äm Schlofzimme

gucke! *(ab)*

Großmutter:

(herein)

Sou, die Schnitzel senn ohgebrote! Jetzt kenne sie ällöh brutzle. Zeije mol her do, die Hous. Wenigschdens hott'a' ma schon alles nogleigt. Awwa die Kont hott'a' net sou sauwa gmacht der Natterer! Ich näh's grad 10 Zentimeter innewennisch nuff, donn sieht's sauwa aus. Unn wonn sie net basst, kann ma aa widda ä Stickl ablosse. Dunnaweddl, kohn schwarze Fade. Krempel ma's schunemol nuff, sou! Wu krie' i' donn jetzat hoddisch schwarze Fade her? Mol 's Sonnche driwwer fore. Dunnaweddl, wonn isch mi net um alles kimmar! Alla, gucke ma mol! *(ab)*

Lisbeth:

(herein)

Sou, des Auto isch fäddisch, wu isch donn die Hous? Zeije mol her! Um Gott's Wille, die hot de Nattara jo schon zehn Zentimeter nuffgekrepelt. Donn isch die jo net nur zehne, donn isch die jo 20 Zentimeter zu long gwes! Schneide ma grad des Doppelte weg, kumm!

Die Braut:

(herein)

Lisbeth, was mesch donn noch? Mir messe lous.

Lisbeth:

Ach äm Hons sei Hous isch noch 20 Zentimeter zu long!

Die Braut:

20 Zentimeter, wer meschd donn sowas?

Lisbeth:

De Natterer, der Daigdreder! Der muss doch än Aff' ghabt hawwe. Un net ämol sauwa abgenäht war sie! Awwa isch richt's jetzt! Unn, bisch glücklich?

Die Braut:

Ja schon!

Lisbeth:

Hert sich net sou iwwazeigt oh!

Die Braut:

Ha doch, de Hons isch än liewa Kerl, un isch meegd wirklich kohn onnare hawwe..

Lisbeth:

Awwa?

Die Braut:

Ja awwa weesch Lisbeth, wu i' sechzehne war, do hawwi i' ma gschwore, mol än gonz varrickte Hund zu haiare, oona, wu aa mol rischdisch Bleedsinn mache kann. Irgendänn rischdisch ausgeflippte Hund!

Lisbeth:

Ja isch weeß, korz vor de Hochzisch kumme ohm nochemol sou Gedonke, es isch joh aa der wischdigschde Schritt äm Lewe.

Die Braut:

Unn der Hons, Lisbeth, ich lieb denn wie kohn onnare, weesch, un mir wärre 's glücklichste Pärle uff de Welt, awwa...

Lisbeth:

Awwa er isch da halt ä bissele zu brav. Horsch, isch will da was saare, mir Fraue messe unsa Männa sowiesou imma noch ä bissele erziehe. Un 's isch oofacha, än Brave varrickt zu ziehe wie umgekehrt!

Die Braut:

(lacht)

Do hosch recht, Lisbeth. Awwa weesch, wonna mol saare deed, heit geh i' net schaffe, heit fahr ma nach Heidelberg ens Holiday Inn unn mache Sektfrihstick, odda heit fahre ma nur äm

Badeohzug mittäm Cabrio uff St. Leon naus, weesch, irgendwas wu ma merkt, dass a' aa ä bissl varrickt sei kann, des fehlt ma schon noch onnem.

Lisbeth: Ich vaschdeh schun was d' moonsch!

(Hans kommt kurz herein und verschwindet wieder)

Lisbeth: Hons, was isch donn, willsch net reikumme? Dei Braut wartet!

Hans: *(von draußen)*

Isch hab nur Unnahouse oh!

Die Braut: *(lacht)*

A Schätzl, derf i' di nimmi än Unnahouse sehe, des wäd doch hoffentlich jetzt öfta mol vorkumme!

Hans: Net unmittelbar vor der Hochzisch, des bringt Uglick!

Lisbeth: *(lacht)*

Valleicht doch än varrickta Hund? Hons, horsch, dei Hous isch fäddisch! Damit's koh Uglick bringt, drehe mir uns jetzat rumm un zähle uff 5, mehr Zeit kriegsch net!

Hans: Alla gut, seid a' soweit?

Lisbeth und die Braut: Mir gucke net! Also: auf die Plätze - fertig - los!

Hans: *(Hans rennt herein und springt in die Hose, während die beiden gemeinsam laut auf fünf zählen, sie drehen sich um)*

Die Braut: Hons, was isch donn des? Knickabocka un Ringelsocke, willsch sou haiare?

Hans: *(schaut nach unten)*

Oh, äh...

Lisbeth: Vun weje zu long!

Hans: *(besinnt sich)*

Was isch donn? Kennt Ihr net die neue Mode? Hochzeitshouse - alla Ringel-Knickabockäär, des isch die neischde Nuwell Cousine aus Paris. Die Geschd solle doch ruhisch was zu gucke hawwe.

Lisbeth: Die Oma wäd än Ohnmacht flieje, wonn sie des sieht!

Hans: Nix do! Do muss sie durch!

(zur Braut)

Horsch Schätzl, jetzat stehsch vor der Entscheidung deines Lebens: Willsch än varrickte Hund haiare, odda än brave Zimmamonn, wu nix vun de neischde Mode vaschdehd?

Die Braut: Mein liewa Hons, des brauchsch mich net zweemol frore!

Her mit dem Kerl!

(zieht ihn lachend hinaus)